



Пётрой бэшээн түрүүшын хандалга

Амаршалга

1 ¹ Понт, Галат, Каппадоки, Аси, Бетани нютагуудаар таража хуу-
нан ерүүл зон, Бурханай шэлэжэ абаһан хүнүүд, таанадые Иисус
Христосой Пётр элшэн амаршална. ² Иисус Христосой үгэ дуулажа,
шуһаарнь сэбэрлүүлхын* тула таанад Эсэгэ Бурханай эрхэ мэдэлээр
шэлэгдэжэ абтаһан байгаат, тэрэнэй Нангин Һүлдэн ашаар арюуд-
хагдаһан байгаат. Бурханай үршөөл хайра, амгалан тайбан та бүхэн-
тэй элбэг дэлбэг байхань болтогой.

Амиды найдал

³ Манай Дээдын Эзэн Иисус Христосой Эсэгэ Бурханда баяр
хүргэ! Үхэһэн Иисус Христосые амидыруулхадаа, Бурхан агууехэ
үршөөл хайраараа шэнэ амидарал бидэндэ үршөөгөө. Тийн маана-
дые амиды найдалаараа дүүргээ, ⁴ тиимэһээ Бурханай өөрынгөө хү-
нүүдтэ үгэхөөр хадагалжа байһан элбэг дэлбэг буян хэшэгтэ хүртэ-
хэбди гэжэ бидэ найданабди. Тэрэ буян хэшэг таанадта тэнгэри
дээрэ хадагалагдана, тэрэ үмхирхэгүй, хүнэхэгүй, бузарлагдахагүй.
⁵ Бурханай хүсэн этигэл хүзэгэйтнай ашаар сагай эсэстэ абаралгада
хүртэтэртнай таанадые хахижа байна. ⁶ Тиимэһээ энээндэ баясажа
байгты. Мүнөө түр зуура элдэб янзын туршалгануудһаа зобожо ту-
лижашье байбал, баясажа байгты. ⁷ Юундэб гэхэдэ, тэдэ зоболон-
гууд танай хүзэг этигэл бодото байна гү гэжэ туршана, батална

* «Гаралгын» номой 24 бүлэгэй 3-8 зүйлнүүдтэ энээн тухай бүри тодорхой
бэшээтэй байһые анхарагты. Израилиин зон Хэлсээнэй тахилай шуһаар
өөһэдыгөө сасажа, Хэлсээндэ хабаатай болодог байгаа. Христосой Бурхан-
тай баталһан хэлсээндэ христос шажантанай хабаатай байһые Пётр иимэ
метафораар зураглана.

гээшэ. Галда шатажа үгы болодог алтаншые галаар туршагдадаг ха юм, зүгөөр танай хүзэг этигэл алтанһаа үлүү үнэтэй, тиимэхээл тэрэнэйтнай үнэн байһыень заабол туршаха, баталха хэрэгтэй юм. Тиигээд лэ таанад Иисус Христосой заларан ерэхэ Үдэр магтаалда, алдар солодо, нэрэ түрэдэ хүртэхэт. ⁸Тэрэниие хараагүйшые хаа, таанад тэрээндэ дуратай байнат; мүнөө тэрэниие харангүйшые байхадаа, тэрээндэ этигэжэ байнат. Тиимэхээ таанад үгэнүүдээр дамжуулхын аргагүй, гайхалтай баяраар баясанат, ⁹юундэб гэхэдэ, өөрыгөө абарха хүзэг этигэлэйнгээ зорилгодо хүрэхэ байнат.

¹⁰Таанадта үгтэхэ Бурханай иимэ үршөөл хайра тухай энэ абаралгада хабаатай, бүхы юумэнүүдые шудалжа, шүүбэрилжэ байһан лүндэншэд уридшалан хэлээ юм. ¹¹Ямар сагта, яажэ тэрэ буян хэшэгтэй үгтэхые лүндэншэд досоогоо байһан Христосой Һүлдэн зааһан сагаар тодорүүлха гэжэ оролдоо. Тиихэдээл Христос зоболонгуудые дабажа гараад, Һүлдэнь алдаршаха гэжэ Һүлдэ уридшалан хэлээ юм. ¹²Өөһэдынгөө аша туһада бэшэ, харин хүзэглэгшэ таанадай аша туһада тэдэнэр алба хэнэ гэжэ Бурхан тэдэ лүндэншэдтэ элирхэйлээ, тиимэхээ тэнгэриһээ эльгээгдэһэн Нангин Һүлдэн дамжуулан Һайн Мэдээсэлые айладхаһан хүнүүдые таанад мүнөө шагнаба гээшэт. Тэрэ нюуса Бурханай Эльгээмэлнүүдшые нээжэ мэдэхэ хүсэлтэй байна.

Арюун нангин ажамидаралтай байгты

¹³Тиимэхээ һэргэлэн байгты, оюун ухаагаараа хүдэлхэдэ бэлэн байгты. Иисус Христосой ерэхэ Үдэр таанадта үгтэхэ буян хэшэгтэ аргагүй ехээр найдажа байгты. ¹⁴Бурханиие мэдэхгүй байһан үе сагтаа ажамидаралыетнай хүтэлдэг байһан хүсэлэнгүүдые дахангүй, Бурханай мэдэлдэ байгты. ¹⁵Таанадые дуудаһан Бурханай арюун нангин байдагтал адляар, таанад алишые талаһаа арюун нангин байгты. ¹⁶«Би арюун нангин байнаб, тиимэхээ таанадшые арюун нангин байгты», – гэжэ Нангин Бэшэгтэ хэлэгдэнэ.

¹⁷Нюур харангүй бүхы хүнүүдые хэһэн хэрэгүүдэйн хэмжээгээр шүүбэрилдэг Бурханиие таанад Эсэгэмнай гэжэ нэрлэнэт, тиимэхээ эндэ, энэ дэлхэйдэ байха үдэрнүүдээ тэрээндэ хүрдэн хүгэдэн үнгэргыт даа. ¹⁸Үбгэ эсэгэнэрһээ залгамжалһан удхагүй хоһон ажамидаралһаа таанад үмхирдэг мүнгэ алтаар абтаһан бэшэт, ¹⁹харин бэеын дутагдалгүй, сэбэр Хурьганай, Христосой үнэтэй сэнтэй шуһаар худалдажа абтагдаһан байгаат. ²⁰Юртэмсэ дэлхэйн зохёон

бүтээгдэхэнээ урда таанадайл аша туһада Бурхан Христосые шэлэжэ абаа юм, үе сагай дүүрэжэ байхада тэрэниие элирхэйлэн харуулаа юм. ²¹ Тэрэнэйл аша туһаар таанад Бурханда этигэнэт. Бурхан тэрэниие үхөөд байхадань амидыруулаа, алдаршуулаа, тиимэхээл таанад Бурханда хүзэглэнэт, найданат.

²² Үнэн зүбые дахажа, Бурханда хүзэглэдэг аха дүүнэртээ үнэн зүрхэнһөө дуратай байхын тула таанад сэдхэл зүрхээ арюудхабат. Тиимэхээ бүхы ханал бодолоороо бэе бээдээ дуратай байгты. ²³ Юундэб гэхэдэ, таанад үмхирдэг үрэхөө бэшэ, харин үмхирдэггүй үрэхөө дахин түрэнэн байгаат. Тэрэ үрэ болбол амиды Бурханай бодото Үгэ юм.

²⁴ *«Ямаршье махабад бэе ногоондо адли.*

Ямаршье хүнэй алдар нэрэ талын сээсэг мэтэ.

Ногооной хатахада сээсэгынь унадаг.

²⁵ *Гэхэтэй хамта Дээдын Эзэнэй Үгэ*

хэтын хэтэдэ мүнхэ оршодог», – гэжэ Нангин Бэшэг соо хэлэгдэнэ.

Энэ Дээдын Эзэнэй Үгэ таанадта номногдоһон һайн Мэдээсэл гээшэ.

Амиды шулуун болон Бурханай хүнүүд

2 ¹ Худалаар хэлэхээ, нүгэл хэхээ болигты, хүнэй нюур бү харагты, хүндэ бү атаархагты, худалаар бү гэршэлэгты. ² Һая түрэнэн үхибүүд яажа хүндэ дуратай байдаг бэ, тэдэндэл адляар таанадшье Бурханай Үгэдэ дуратай байгты. Тэрэнэй ашаар таанад ургахат, абарагдахат. ³ «Дээдын Эзэнэй үршөөлые таанад мэдэрээт», – гэжэ Нангин Бэшэгтэ хэлэгдэнэ ха юм.

⁴ Хүнүүдэй голоһон, зүгөөр Бурханай шэлэжэ абанан, Бурханай нюдэндэ үнэтэй сэнтэй байдаг амиды шулуунда – Дээдын Эзэндэ – ерэгты. ⁵ Таанад амиды шулуунуудта адли Бурханда ерэгты, тиигээд Бурхан таанадһаа хүмэ бодхоохо, тиигээд тэрэ хүмэдөө таанад нангин санаартан болоод, Иисус Христосоор дамжуулан Нангин Һүлдэхөө Бурханда һайшаагдаха оюун ухаанай үргэл асаржа байгты.

⁶ Нангин Бэшэг соо: «Эгээн шухала, шэлэгдэжэ абтанан, үнэтэй сэнтэй шулууе Сион дээрэ мүнөө би табинаб; тэрээндэ этигэнэн хүн хээээшье эшэхэгүй», – гэжэ хэлэгдэнэ. ⁷ Тиимэхээ хүзэглэгшэ таанадта Христос агууехэ баялиг болоно, харин хүзэглэдэггүй хүнүүдтэ тэрэ «барилгашадай голоһон шулуун» байһан аад, эгээн шухала, ⁸ хүнүүдэй бүдэрдэг шулуун, хүнүүдэй торожо унадаг шулуун болоо.

Һайн Мэдээсэлдэ этигэдэггүйл хадаа тэдэнэр бүдэржэ байна. Тэдэнэр тиимэ табилантай юм.

⁹ Тиихэдэ таанад шэлэгдэжэ абтаһан угсаатан гээшэт, Хаанай санаартад, нангин арад, Бурханай хүнүүд болонот, шэб харанхыһаа таанадые гайхалтай гэрэл туяадаа дуудаһан Бурханай агууехэ үйлэ хэрэгүүд тухай номнохоор шэлэгдэһэн хүнүүд гээшэт.

¹⁰ *Урдань таанад Бурханай хүнүүд бэшэ һэнта,
зүгөөр мүнөө таанад тэрэнэй хүнүүд гээшэт.
Урдань таанад Бурханай үршөөл хайрые мэдэхгүй һэнта,
мүнөө таанад тэрэнэй үршөөл хайрада хүртэбэт.*

Һүзэглэгшэдэй баримталха ёһотой дүримүүд

¹¹ Хүндэтэ аха дүүнэрни, энэ дэлхэйдэ таанад хариин, ерүүл хүнүүд юм хадаа танай ухаан бодолые һамааруулдаг нүгэлтэ хүсэлэнгүүдһээ холодожо, ¹² бусад арадуудай дунда өөһэдыгөө һайн абажа ябагты гэжэ гуйнаб. Тиигэбэлтнай мүнөө таанадые нүгэл хэгшэд гэжэ хардажа байһан зон таанадай һайн һайхан үйлэ хэрэгүүдые харахадаа, Бурханай газар дэлхэй дээрэ хүнүүдые шалгахаяа ерэхэдэнь, тэрэниие алдаршуулха.

¹³ Дээдын Эзэнэй түлөө засаг захиргаанай үгэ дуулажа байгты: дээдэ засаг захиргааниие түлөөлһэн хаанай мэдэлдэ байгты, ¹⁴ хуули эбдэһэн хүнүүдые хэһээхын тула, һайн һайхан хэрэгүүдые бүтэһэн хүнүүдые урмашуулхын тула хаанай табиһан захирагшадай үгэ дуулажа байгты. ¹⁵ Бидэ һайн һайхан лэ хэрэгүүдые бүтээжэ, хэрэггүй юумэ шашадаг тэнэг хүнүүдэй амыень хааха ёһотойбди. Бурхан тэрэниие хүсэдэг. ¹⁶ Эрхэ сүлөөтэй хүнүүдтэл адляар ажамидарагты. Зүгөөр элдэб янзын нүгэлнүүдэе нюухын тула тэрэ эрхэ сүлөөгөө бү хэрэглэгты. Таанад Бурханай зарасанарта адляар ажамидарагты. ¹⁷ Хүн бүхэниие хүндэлжэ байгты. Һүзэглэгшэ бүлгэмдөө дураатай байгты. Бурханһаа айн хүрдэгты, хааниие хүндэлжэ ябагты.

Зарасанарай баримталха ёһотой дүримүүд

¹⁸ Зарасанар, эзэдээ хүндэлжэ, үгыень дуулажа байгты. Гансал һайн аашатай, зөөлэн зантай эзэдээ бэшэ, харин шэрүүншые зантай эзэдээ дуулажа байгты. ¹⁹ Бурханай дура хүсэлые мэдэрһэн дээрэһээ гэм зэмэгүй зобожо, гай гасалан дабажа байһан хүниие Бурхан буюн хэшэгтээ хүртөөхэ. ²⁰ Зэмэтэй байһандаа сохюулаад лэ, тэсэжэ ябабалтнай, тэрэтнай таанадта аша түһатай байха аал? Харин һайн

хайхан хэрэгүүдые бүтээжэ байхадаа тэсэбэритэйгээр зоболон эдлэжэ байбалтнай, Бурхан таанадые найшааха.

²¹Тиимэ тэсэбэритэй байхынтнай тула Бурхан таанадые дуудаа, тиихэдэ Христос өөрыень нажаажа байхынтнай тула таанадай түлөө зоболон эдлэжэ, таанадта жэшээ харуулаа. ²²Тэрэ ямаршые нүгэл хээгүй, тэрэнэй худал юумэ хэлэжэ байхыень нэгшые хүн дуулаагүй. ²³Тэрэниие доромжолжо байхада, тэрэ доромжолһон харюу үгөөгүй, тэрэ зобожо байхадаа, зобоогшодойнгоо урдаһаа занаагүй, зүгөөр тэрэ өөрыгөө үнэн сэхэ Заргашын гарта үгөө юм. ²⁴Бидэнэй нүгэл шэбэлһээ зайсажа, үнэн зүбөөр амидархымнай тула Иисус өөр дээрээ нүгэл шэбэлыемнай үргэлжэ абаа, модон дээрэ үргэгдөө: тэрэнэй шархаар таанад аршалагдан эдэгээгдэһэн байгаат. ²⁵Таанад төөриһэн хонид мэтэ адуулагшагүй ябаат, мүнөө Адуулагшадаа, харууһалагшадаа таанад бусажа ерээт.

Эхэнэрнүүдэй баримталха ёһотой дүримүүд

3¹⁻² Эхэнэрнүүд, таанад баһал нүхэдэйнгээ мэдэлдэ байгты; хэрбээ тэдэнэрэй дунда Бурханай Үгэдэ этигэдэггүй хэн нэгэн байгаа хаа, эхэнэрэйнгээ арюун сэбэр, хүзэгтэй ажамидалалые хараад, этигэхэл. Тиихэдэ таанадта юумэ хэлэжэ байхын хэрэг үгы. ³Гоё хайхан болохын тула таанад өөһэдыгөө гадна талаһаа шэмэглэжэ, үһээ гоёожо гү, али алтан зүүдхэлнүүдые зүүжэ гү, али зөөлэн хубсаһа үмдэжэ бү байгты. ⁴Харин Бурханда аргагүй найшаагдадаг сэдхэлэй даруу ба зөөлэн занһаа гараһан үнэн бодото мүнхын гоёолтоор өөһэдыгөө шэмэглэгты. ⁵Урдань Бурханда найдадаг эхэнэрнүүд өөһэдыгөө тиигэжэл шэмэглэдэг, нүхэдэйнгээ үгэ дууладаг байһан юм. ⁶Сарра тиигэжэл Абраһамай үгэ дууладаг, тэрэнээ эзэмни гэжэ нэрлэдэг хэн. Һайн хайхан хэрэгүүдые бүтээжэ, ямаршые юумэнһээ айдаггүй байбал, таанадшые баһал Саррын басагад гээшэт.

⁷Эрэшүүл, таанадшые һамгадаа хүндэлжэ, ойлгожо байгты, тэдэтнай таанадта ороходоо һула хүнүүд ха юм. Тиихэдэ тэдэтнай таанадтайл адлихан Бурханай ажамидалалай шагналда хүртэхэ. Бурханай үгын ёһоор эхэнэрнүүдтээ хандажа байбалтнай, ямаршые юумэн зальбархадатнай һаалта болохогүй.

Хүзэглэгшэдэй баримталха ёһотой үшөө хэдэн дүримүүд

⁸ Түгэсхэлдэнь хэлэхэдэ, таанад булта нэгэ ханал бодолтой байгты, адляар юумэндэ хандажа байгты, бэе бээдээ аха дүүнэдтэл адли дуратай байгты, бэе бээ хайрлажа, даруухан ажамидарагты. ⁹ Таанадта муу юумэ хэхэдэнь, харюудань муу юумэ бү хэгты; таанадые хараахадань, урдаһаань бү хараагты. Харин буян хэшэгтээ хүртөөхын тула Бурхан таанадые уряалан дуудаа гэжэ мэдэн, хайн хайхан хэрэгүүдые бүтээжэ, хайн үгөөр үрээлжэ байгты.

¹⁰ *«Ажамидаралда дуратай,
хайн хайхан үдэрнүүдые
үзэхэ дуратай хүн
нүгэлтэ юумэ бү хэлэг,
худалаар дуугархаяа болиг.*

¹¹ *Тэрэ хүн нүгэл үйлэдэхээ болёод,
хайн хайхан хэрэгүүдые бүтээжэ байг,
энхэ тайбан байдалые найруулжа байг,
энхэ тайбан байдалые тогтоожо байг.*

¹² *Дээдын Эзэн үнэн сэдхэлтэниие хаража байдаг,
тэдэнэй зальбаралнуудые дуулажа байдаг,
харин муу юумэ хэгшэдые тэрэ буруушаадаг юм», – гэжэ
Нангин Бэшэг соо хэлэгдэнэ.*

¹³ Хайн юумэ хэхэ дуратай байбалтнай, хэн таанадта хаалта болохоб? ¹⁴ Зүб юумэ хэжэ байһанайнгаа түлөө зоболон эдлэжэ байбалтнай, Бурхан ашыетнай харюулхал! Хэнһээшье бү айгты, ханаагаа бү зобогты. ¹⁵ Харин зүрхэ сэдхэлдээ Дээдын Эзэн Христосые аргагүй хүндэлжэ ябагты. Ямаршье хүнэй ажамидаралайтнай найдал тухай хурабалнь, хэзээшье харюу үгэхэдэ бэлэн байгты. ¹⁶ Тиихэдээ дарууханаар, хүндэлһэнөө харуулан харюусаарайт. Һэшхэлтнай арюун сэбэр байг, тиигэбэл Христосто хүзэглэдэг танай үлзыгтэй ажамидаралые хардадаг хүнүүд өөһэдынгөө хэлэһэн үгэнүүдһээ эшэхэл. ¹⁷ Бурханай хүсэлөөр нүгэл хэжэ байһанайнгаа түлөө бэшэ, харин хайн хайхан хэрэгүүдые бүтээжэ байһанайнгаа түлөө зобожо байһань дээрэ юм.

¹⁸ Бидэниие Бурханда хандуулхын тула Христос манай нүгэл шэбэлэй түлөө нэгэтэ зоболон эдлэһэн байна. Тэрэ үнэн сэдхэлтэн хара ханаатай зоной түлөө бээ хүнөөлгэжэ, хүлдөөрөө амидыран юм. ¹⁹ Тиигээд хүлдөөрөө хаалтада байһан хүлдэнүүдтэ ошожо

номноо юм. ²⁰ Нойн томо корабль барижа дүүргэхые Бурханай ехэ тэсэбэритэйгээр хүлээжэ байха үе сагта тэдэ хүлдэнүүд мэдэлдэнь байхаяа арсаа бэлэй. Нойн бариһан корабльда үсөөн хүн, хамтадаа найман хүн уһанһаа абарагдаһан юм. ²¹ Тиигэжэ уһанһаа абарагдаһаниинь мүнөө бидэниие абаржа байдаг уһан арюудхалай бэлгэ тэмдэг болоо. Уһан арюудхалга бэеын муухайе арилгана бэшэ, харин Иисус Христосой амидыралгын ашаар һайн һайхан сэдхэл үршөөхыень Бурханһаа гуйна. ²² Христос тэнгэридэ дэгдээд, бүхы Эльгээмэлнүүдые, тэнгэрийн бүхы захиргаан, хүсэнүүдые эрхилэн, Бурханай баруун таладань оршоно.

4 ¹ Христос махабад бэеэрээ зоболон эдлээ, тиимэхээ таанадшые тиигэжэ зобоходо бэлэн байха ёһотойт, юундэб гэхэдэ, зобожо байһан хүн нүгэл хэхэээ болидог. Христосой түлөө зобохые хүсэхэдөө, таанад нүгэл хэхэээ болиһоноо баталнат. ² Энэ сагһаа эхилээд, газар дэлхэй дээрэ үнгэргэхэ үдэрнүүдтээ хүнэй хүсэлэнгүүдые дахаха бэшэ, харин Бурханай дура хүсэлөөр ажамидарха ёһотойт. ³ Урдань таанад бусад арадуудай хэхэ дуратай юумэнүүдые хэжэ, нилээн саг үнгэргөөт. Зохихогүй юумэнүүдые үйлэдэжэ, зальхайржа, архидажа, һогтуу хүнүүдээр ниилэжэ, найрлажа, онгонуудта жэрхэдэһэтэйгээр мүргэжэ байгаат. ⁴ Мүнөө тэдэнээр ниилэн зальхайрха, забхайрхаяа болиходотнай тэдэтнай ехээр гайхалдана, тиимэхээл таанадые доромжолно. ⁵ Гэхэтэй хамта амиды ба үхэһэн хүнүүдые һаядаа шүүхэ Бурханай урда тэдэнэр үйлэдэһэн бүхы юумэнүүдэйнгээ түлөө харюусаха. ⁶ Тиимэхээл Христос һайн Мэдээсэлые үхэһэн хүнүүдтэ баһа номноо гээшэ. Тэдэнэр махабад бэеэрээ хүн бүхэндэл адли зарга шүүбэридэ үгтэхэ, харин хүлдөөрөө тэдэнэр Бурхандал адляар амидарха боломжотой юм.

⁷ Бүхы юумэнэй эсэс ойртожо байна. Тиимэхээ хүбэлгэн байгты, бээ баригты, тиигэбэл зальбарха аргатай байхат. ⁸ Юумэнэй түрүүндэ үнэн зүрхэнһөө бэе бээдээ дуратай байгты, юундэб гэхэдэ, дуран олон нүгэлнүүдые хүлисэн арилгадаг юм. ⁹ Бэе бээ гэртээ айлшалуулхадаа, элдэбээр бү гэмэрэгты. ¹⁰ Хүн бүхэнтнай Бурханһаа абьяастай юм, тиин тэрэ олон янзын абьяаснуудаа ухаатайгаар, бэе бээдээ аша туһатайгаар хэрэглэжэ байгты даа.

¹¹ *Номножо байһан хүн
Бурханай Мэдээсэлые номножо байг лэ;
алба хэжэ байһан хүн*

*Бурханай үршөөхэн хүсэ шадалаар
өөрыгөө бэхижүүлжэ байг лэ.
Бұхы юумэнүүд Иисус Христосоор дамжан
Бурхание алдаршуулжа байг лэ!
Бурхан хэтын хэтэдэ алдар солотой,
хүсэ шадалтай байхань болтогой!
Зобоходоо баясажа байгты.*

¹² Хүндэтэ аха дүүнэрни, зоболонто туршалгануудай тохёолдобол, бү гайхаарайт, гайхалтай юумэн гэжэ бү бодооройт. ¹³ Зүгөөр, Христосой зоболонгуудые хубаалсажа байһандаа баясажа байгаарайт, тэрэнэй һүр жабхалантайгаар ерэхэ Үдэрнь таанад баясахат, хүхихэт. ¹⁴ Христосой нэрэ алдарай түлөө таанадые хүнүүдэй доромжолболнь, таанад жаргалтайт. Ушарынь хэлэбэл, алдар солын Һүлдэ, Бурханай Һүлдэ таанад соо оршоно гээшэ. ¹⁵ Алууршан, хулгайшан, хүнэй хэрэгүүдтэ оролсодог, хуули эбдэһэн хүн байһанһаа боложо хэнтнайшые зоболон эдлэхэгүйнь болтогой. ¹⁶ Гэхэтэй сасуу христос шажанай түлөө зоболон эдлэбэл, бү эшэгты, тиимэ хубитай байһандаа Бурхание алдаршуулжа байгты.

¹⁷ Зарга шүүбэриин эхилхэ саг дүтэлөөд байна. Тиихэдэ Бурханай хүнүүд хамагай түрүүн зарга шүүбэридэ орохо. Хэрбээ заргаяа бидэнһээ эхилбэл, Бурханда хүзэглэхэеэ арсаһан хүнүүд ямар хойшолонтой байхань гээшэб?

¹⁸ *«Һайн хүнүүдэй абарагдахада хүшэр байхадань,
Һүзэггүй, нүгэлтэй зон яахань гээшэб?» – гэжэ Нангин Бэшэ
соо хэлэгдэнэ.*

¹⁹ Тиимэхээ Бурханай дура хүсэлөөр зоболон эдлэжэ байһан хүнүүд үнэн сэхэ Бүтээгшэдэ өөһэдыгөө бүрин бүтэн даалгаг лэ, һайн һайхан хэрэгүүдые бүтээжэ байг лэ.

5 ¹ Мүнөө би танай хүзэглэгшэдэй бүлгэмэй хүтэлэгшэдтэ ханданаб. Би өөрөө бүлгэмэй хүтэлэгшэб, Христосой зобохыень хараа һэнби, һаядаа элирхэйлэгдэхэ тэрэнэй алдарые хубаалсахаб. ² Таанадта даалгагдаһан Бурханай хүрэгые адуулжа байгты. Баалалтаар хэжэ байһан мэтэ бэшэ, харин сэдхэлээрээ энэ хэрэгые бүтээжэ байгты. Олзо олохо зорилготойгоор бэшэ, харин оролдосотойгоор алба хэжэ байгты. ³ Таанадта даалгагдаһан хүнүүдые захирха гэжэ бү оролдогты, харин тэдэндээ һайн жэшээ харуулжа байгты. ⁴ Тиигэбэл, таанад эгээн ехэ Адуулагшын ерэхэдэ, хүнэшэгүй алдарай шагналда хүртэхэт.

⁵ Залуушуул, таанад баһал бүлгэмэй хүтэлэгшэдэй үгэ дуулажа байгты. Таанад булта бэе бээдээ номгон даруугаар хандажа байгты. «Бурхан омог зантай зоние буруушаадаг, харин даруу номгон зондо үршөөлтэйгөөр хандадаг», – гэжэ Нангин Бэшэг соо хэлэгдэнэ. ⁶ Тиимэхээ хүр хүсэтэй Бурханай урда даруухан байгты, тиигэбэлтнай сагай ерэхэдэ, Бурхан таанадые дээшэнь үргэхэл. ⁷ Бүхы бэрхэ-шээлнүүдээ Бурханда даалгагты, тэрэ хойноһоотнай хаража байхал.

⁸ Һэргэлэн байгты, бү унтагты. Танай дайсан болохо шолмос эдихэ зууха хүниие бэдэржэ байһан арсалан мэтэ хүрхиржэ ябана. ⁹ Хатуу этигэл хүзэгтэй зогсогты, шолмосто бү абтагты; бүхы дэлхэйгээр аха дүүнэртнай тиимэл зоболонгуудые дабажа байна гэжэ мэдэжэ байгты. ¹⁰ Зүгөөр танай зоболонгууд һаядаа дууһаха. Иисус Христостой нэгэдүүлэн, мүнхэ алдараараа хубаалсахын тула таанадые дуудаһан, элдэб үршөөлнүүдэй эхин болохо Бурхан таанадые заһаха, бэхижүүлхэ, хүсэ шадалтай болгохо, батадхаха. ¹¹ Тэрэ хэтын хэтэдэ захиржа байг лэ. Болтогой!*

¹² Христосой шударгы хүзэглэгшэ Силуанай туһаламжаар би таанадта энэ богонихон бэшэг бэшээб. Таанадые урмашуулха ба Бурханай буян хэшэгые таанадта дамжуулха зорилготойгоор бэшээб. Энэ буян хэшэгые хатуу баримталжа байгты.

¹³ Таанадтал адли шэлэгдэжэ абтаһан Вавилондохи эгэшэтнай, Марк хүбүүмни таанадта мэндые хүргэнэ. ¹⁴ Аха дүүнэрэй дура элирхэйлэн бэе бээ таалан амаршалагты. Христостой нэгэн хамта та бүхэн энхэ тайбан байхатнай болтогой.

* Тэрэ хэтын хэтэдэ захиржа, алдар солотой байг лэ.